



**SOALAN LAZIM (FAQ'S)**  
**MENGENAI PERINTAH KAWALAN PERGERAKAN**  
**KEMENTERIAN PERUSAHAAN PERLADANGAN DAN KOMODITI**

- 1. Adakah sektor perladangan dan komoditi tertakluk kepada Perintah Kawalan Pergerakan yang telah diumumkan oleh YAB Perdana Menteri?**

Ya. Ini bermakna semua kerja di sektor perladangan dan komoditi tertakluk kepada perintah yang dikeluarkan.

- 2. Adakah terdapat kelonggaran terhadap mana-mana subsektor perladangan dan komoditi dari Perintah tersebut?**

Ada, iaitu bagi kerja-kerja yang terlibat secara langsung dengan pengeluaran produk yang dikategorikan sebagai *essential items* dan kritikal di bawah sektor perladangan dan komoditi.

- 3. Apakah subsektor, aktiviti dan siapa yang dibenarkan terlibat dengan kelonggaran di sektor perladangan dan komoditi?**

**SAWIT**

- (i) Aktiviti yang terlibat bagi subsektor sawit adalah seperti berikut:
- (a) Penuaian buah tandan segar sawit oleh syarikat perladangan dan pekebun kecil;
  - (b) Penjualan buah tandan segar sawit kepada peniaga buah sawit;
  - (c) Pemprosesan buah tandan segar dilaksanakan oleh kilang-kilang sawit; dan
  - (d) Pemprosesan minyak sawit mentah di kilang penapis untuk pengeluaran minyak masak bagi memenuhi keperluan pasaran tempatan.

- (ii) Pihak yang terlibat dengan kelonggaran ini adalah pemilik ladang/pekebun kecil, peniaga buah sawit (DF), pengilang buah kelapa sawit (MF) dan pengilang penapis (RF) yang mempunyai lesen yang berdaftar dan masih sah dengan Lembaga Minyak Sawit Malaysia (MPOB).

### **GETAH**

- (i) Aktiviti yang terlibat bagi subsektor getah adalah penorehan getah bagi tujuan pembekalan bahan mentah untuk penghasilan produk peralatan perubatan seperti sarung tangan dan kateter; dan
- (ii) Pihak yang terlibat dengan kelonggaran ini adalah:
- (a) Pemilik ladang atau pekebun kecil yang memiliki kad Permit Autoriti Transaksi Getah (PAT-G);
  - (b) Pembeli getah berlesen yang masih sah dengan Lembaga Getah Malaysia (LGM); dan
  - (c) Syarikat pemprosesan getah bagi memenuhi keperluan untuk penghasilan produk peralatan perubatan dan lain-lain.

### **KAYU-KAYAN**

- (i) Aktiviti pemprosesan industri kayu-kayan melibatkan konsainmen sebagaimana dalam kontrak sedia ada sahaja tertakluk kepada syarat-syarat seperti berikut:
- (a) Permohonan lesen hanya akan dipertimbangkan menerusi sistem online Lembaga Perindustrian Kayu Malaysia (MTIB); dan
  - (b) Pihak yang terlibat perlu mengemukakan senarai pekerja yang terlibat kepada MTIB semasa tempoh ini dan memastikan pergerakan pekerja terbabit hanya terhad dari rumah ke kilang/premis.

## **4. Apakah prosedur pencegahan yang perlu diambil?**

Setiap pemilik ladang/pekebun kecil dan pengilang perlu melaksanakan perkara-perkara berikut untuk mengurangkan risiko potensi jangkitan COVID-19 di kalangan pekerja semasa tempoh Perintah:

- (i) Pemeriksaan dan Pemantauan Kesihatan Sebelum Operasi**

- (a) Semua pekerja adalah tertakluk kepada pemeriksaan kesihatan sebelum memasuki kawasan operasi dengan menggunakan *non-contact thermometer* dan pemeriksaan bagi simptom-simptom COVID-19;
- (b) Maklumat mengenai tahap kesihatan pekerja hendaklah direkodkan dan disimpan oleh pemilik ladang/pekebun kecil dan pengilang;
- (c) Semua pekerja hendaklah sentiasa mengekalkan kebersihan diri dan mengamalkan penjarakan sosial (*social distancing*) dengan mengekalkan jarak sekurang-kurangnya 1 meter dengan pekerja yang lain; dan
- (d) Mana-mana pekerja yang telah dikenalpasti menunjukkan simptom-simptom COVID-19 hendaklah diberikan akses untuk mendapatkan rawatan perubatan dengan kadar segera dan tindakan kuarantin perlu diambil. Justeru, pemilik ladang/pekebun kecil dan pengilang perlu menyediakan tempat kuarantin yang bersesuaian sekiranya kejadian ini berlaku.

**(ii) Tindakan Pencegahan Semasa Operasi**

- (a) Pengangkutan pekerja ke tempat operasi dalam kumpulan besar adalah tidak dibenarkan. Pemilik ladang/pekebun kecil dan pengilang perlu meminimakan bilangan pekerja yang perlu melaksanakan operasi bagi mengurangkan risiko jangkitan di kalangan pekerja;
- (b) Semua pekerja hendaklah sentiasa mengekalkan kebersihan diri dan mengamalkan penjarakan sosial (*social distancing*) dengan mengekalkan jarak sekurang-kurangnya 1 meter antara seorang pekerja dengan pekerja yang lain sepanjang tempoh operasi;
- (c) Pemilik ladang/pekebun kecil dan pengilang perlu meminimakan situasi yang memerlukan para pekerja berkumpul secara beramai-ramai. Antaranya melaksanakan waktu rehat secara berperingkat bagi mengelakkan situasi berkenaan;
- (d) Pemilik ladang/pekebun kecil dan pengilang perlu menyediakan peralatan pencegahan penularan wabak seperti *hand sanitiser* dan topeng muka serta menempatkannya di lokasi-lokasi strategik di tempat tumpuan seperti pintu masuk ke kawasan operasi, surau, kantin dan kenderaan pekerja; dan

- (e) Pemilik ladang/pekebun kecil dan pengilang perlu melaksanakan proses disinfeksi secara kerap di kawasan operasi terutamanya di kawasan-kawasan yang menjadi tumpuan pekerja.

**(iii) Pemeriksaan Kesihatan ke Atas Pelawat/Pembekal**

- (a) Pelawat dan pembekal yang memasuki kawasan operasi perlu dihadkan dan mereka hanya dibenarkan memasuki kawasan operasi bagi tujuan yang benar-benar kritikal sahaja;
- (b) Tahap kesihatan semua pelawat dan pembekal hendaklah diperiksa dengan menggunakan *non-contact thermometer* dan diperiksa bagi simptom-simptom COVID-19; dan
- (c) Mana-mana pelawat dan pembekal yang telah dikenalpasti menunjukkan simptom-simptom COVID-19 tidak dibenarkan memasuki ke kawasan operasi.

**5. Apakah tindakan yang boleh dikenakan sekiranya melanggar Perintah ini?**

Kerajaan ingin menegaskan bahawa kelonggaran ini boleh dibatalkan dan ditarik balik, sekiranya syarat-syarat yang ditetapkan tidak dipatuhi oleh pihak pemilik ladang/pekebun kecil dan pengilang.

**6. Siapakah yang boleh dihubungi bagi mendapatkan maklumat lanjut?**

Sekiranya ada sebarang pertanyaan lanjut mengenai perkara ini, boleh hubungi Unit Komunikasi Korporat, Kementerian Perusahaan Perladangan dan Komoditi (UKK, MPIC) di talian yang disediakan di 03-8880 3321 / 03-8880 3325, dari jam 8.00 pagi hingga 5.00 petang.

Kerajaan berhak untuk meminda syarat-syarat di atas tertakluk kepada situasi semasa.

**KEMENTERIAN PERUSAHAAN PERLADANGAN DAN KOMODITI  
20 MAC 2020**